



# Naalackersuisoqatigiit ilassutitut isumaqatigiissutaat

*Isumaqatigiissummut 4. april 2022-imeersumut ilassut.*

## Peqqinnissaq

Peqqinnissaqarfik inuit inuunerannut toqqissisimanerannullu qitiuvoq nunatsinnilu najoruminartuunissatsinnut peqqinnissaqarfimmik aqutsineq aalajangiisuuvoq. Taamaammat peqqinnissaqarfik innuttaasuniit naatsorsuutigineqarsinnaasoq toqqissisimanartorlu pilersinniarlugu sulineq pimoorusaq ingerlanneqassaaq. Nunatsinni peqqinnissamut inuunerissaarnissamullu politiki innuttaasut tamarmik peqqinnerulernissaanik siunertaqarpoq. Inuiaqatigiinni naligiimmik sullinneqarnissaq toqqammaviuvoq, taamaattumillu pitsaasumik qaffasissumillu peqqinnissaqarfimmit sullissisoqarnissaa ilungersuullugu sulissutigineqassaaq. Tamanna pisussaaffiliivoq, ataatsimut isiginnittaaseqarluni timikkut, tarnikkut anersaakkullu peqqissuseqarnissatta qulakkeernissaa pisariaqarmat.

Nunaqariaasitsinnut naleqquttumik siammasissumik aqqissuussamik peqqissaaveqartariaqarnera tulluarneqassaaq. Nunatsinni ikiliartunnginnissarput siunertaralugu peqqinnissaqarfiup iluarsartuunneqarqinnerani inuit katsorsarneqarnissaminnut pisariaqartitaat tunngavigalugit sulineq ingerlanneqassaaq. Peqqinnissaqarfiup aqunneqarnerata nukittorsarneqarnissaa ingerlanneqassaaq, peqqinnissaqarfiup atuisunut naleqqussarneqarnissaa sallitullugu. Taamaaliorneq periarfissanik ajunnginnerusunik pilersitsissaaq, aamma takornartanik nakorsaarnissaq ilutigisaanik ujartorneqassaaq. Peqatigisaanik nunatsinni ernisarfiit eqiterutsikkiartornagit amerlanerusunik ernisarfeqarnissaq naalackersuinikkut ukkatarineqassaaq.

## Akilerartarneq pillugu aqqissuusseqqinneq

Sulineq imminut akilersinnaanerulersinniarneqassaaq aamma pinngitsaaliissummik utoqqalinersianut katersisussaataaneq aqqinneqassaaq, inuit kiffaanngissusaat innarlernagu sulineq tunngaviussammat.

Akilerartarneq pillugu tunngaviusumik aqqissuusseqqinneq nanginneqassaaq, inuit isertitakinnerusut sulisartukkormiullu atugaat aammalu utoqqalinersiallit siusinaartumillu pisartagaqartut akilerartarnikkut aqqissuusseqqinnermi oqilisaavigineqarnissaat pingaarnerpaajussalluni.

Akilerartarnermi aqqissuusseqqinnermi suliarlorlutik tikittut tamarmik ullormi siullermit akilerartussaataalernissaat ilanngullugu suliarineqassaaq.



Akilerartarneq pillugu aqqissuussisimaneq eqaallisarneqassaaq, akilerartartut akileraarutitik pillugit paasisinnaasaannik aqqissuussisimanikkut aamma akilerartussaataaneq inuttut tamatta illersorsinnaaqullugu. Akileraarusersuineq pillugu inatsit tamanit paasineqarsinnaassaaq, allaffissornikkut sulineq akiliisitsiniartarnerullu inunntut ataasiakkaanut paasinartumik aqqissuussimaneratigut. Ilutigisaanittaaq akileraarusersueriaaseq namminersortunngorsaannermut ikorfartuissaaq, taamaalilluni aningaasarsiornerup annertusarnissaanut aqutissieqataassalluni.

Aqqissuussineq nalinginnaasumik tamanut eqquisussamik akitsuusersuineq, VAT-mik aqqissuussinermik taarserneqarsinnaanera misissorneqassaaq, taamaaliornikkut pisiassat akitsuusersugassat isertitaqassutsimut naleqqussarneqarnerusinnaanerat nalilersorneqarsinnaasunngorlugu.

Nunatsinni akileraarusersueriaaseqarnermut aamma isertitanut politiki aningaasarsiornerup qaffassarneqarnissaanik, isertitatigut assigiinnginnerup akiorneqarnissaanik avatangiisillu illersorneqarnissaanik siunertaqassaaq. Akileraarusersueriaaseq pissutsit allanngorartut iluanni eqaatsumik naleqqussarneqarsinnaassaaq.

Nunatsinni inoqarfiit akornanni naligiinnginnerup suli annertusiartornera aqqiiviginiarlugu naligiinnerusumik ineriartornissamik tunngavilimmuut aqqissuusseqqittoqassaaq. Nammaqatigiinneq assigiinnerusumillu ineriartornissaq pingaarnerpaatut ersarissumik timitalerlugu sulissutigineqartariaqarmat.

## Namminersorneq pillugu Inatsit

Kalaallit Nunaata naalagaaffinngornissamut ingerlanera Inuiaat Kalaallinut tigussaasumik timitalersorlugu ingerlanissaa pisariaqarpoq. Inuiannut Kalaallinut kiffaanngissuseqarneq aamma oqartussaaqataaneq annertunerpaaq angutserlugu pitsaasumik ikaarsaariarnissaq piareersarneqassaaq. Innuttaasut atugaat, aningaasarsiornikkut periarfissaat naalagaaffinngornissamullu sanarfinerat tamarmik peqatigiinnikkut ataatsimoortitsinikkullu ingerlanneqassapput.

Naalackersuisoqarfimmik pilersitsinikkut Naalagaaffinngornissamut ikaarsaariarnissaq pitsaasumik suliarineqassaaq. Tamatumani Namminersorneq pillugu Inatsit naapertorlugu oqartussaaffiit isummerfigisassat naammasseqqullugit suliaqartoqassalluni, alloriartoqartikkumallugulu akisussaaffiit naalagaaffimmiit tiguneqartussat tulleriarlugit isummerfigisassanngortinneqassapput. Ilutigisaanik Nunatta nunanut allanut politikikkut tamakkiisumik oqartussaaffeqalernissaa isummerfigisassanut sallernut ilaassaaq.



## Aatsitassat

Inuussutissarsiutit aningaasanillu inuiaqatigiinni isaatitsisussat sulissutigineqarnerat annertusineqassaaq. Inuiaqatigiillu pisuussutaat uumaatsut tamakkiisumik inuiaqatigiinnut iluaqutaanissaat isaatitsisutigilernissaallu siunertaralugu sulineq ingerlassaaq, aamma Namminersorneq pillugu Inatsimmi aningaasanik isaatitsinerulernissamut sanngeequtaasut nalilersoqqinneqassapput.

Aatsitassanut pinngoqqaatinullu qaqutigootunut suugaluartunulluunniit illersorneqarsinnaasumik isumannaatsumillu inatsisillu malillugit periuseqarnissaq pillugu Nunatta politikeqarnera siunertaqarpoq, aningaasarsiornikkut ineriartornissamik aamma avatangiisinut inuiaqatigiinnullu illersuisumik ingerlatsinissamik. Aatsitassarsiorneq Nunatta inuisa atugarissaarnerulernissaanut pitsaasumik sunniuteqassaaq, ilutigisaanik avatangiisit illersorneqarnissaat aamma nunarsuarmioqatigiit avatangiisitsinnut piumasaqaataannut naapertuuttumik sulineq tunngaveqassaaq.

Nunatsinni aatsitassarsiornerit peqqissutsimut, pinngortitamut isumannaallisaanermullu akornusiingippata Inatsisartut inatsisaat atuuttut tunngavigalugit aallartinneqarlutik aningaasarsiutaalissapput. Aatsitassarsiorfiusinnaasut inoqarfinnut qanittumiittut tamarmik immikkut ittumik isiginiarneqassapput, avatangiisinut peqqissutsimut inunnullu tunngasunik annertusisamik piumasaqaateqarfigineqassapput aamma sumiiffimmi najugaqartut pilersaarutini pineqartuni qanimut akuutinneqartassallutik.

Nuuk, \_\_\_\_\_ / \_\_\_\_\_ - 2023

---

Múte B. Egede  
Siulittaasoq, Inuit Ataqtigiit

---

Erik Jensen  
Siulittaasoq, Siumut